



ЎЗКИМЁСАНОАТ
АКЦИЯДОРЛИК ЖАМИЯТИ

2022 йил 14-март

«ЎЗКИМЁСАНОАТ» АКЦИЯДОРЛИК ЖАМИЯТИНИНГ РАСМИЙ БАЁНОТИ



Бугун ижтимоий тармоқларда айрим фуқаролар томонидан ёзилган: « «Навоиазот» корхоналаридан атроф муҳит ҳамда инсонлар саломатлиги учун жиддий зарар етказувчи захарли моддалар ва газлар ҳавога чиқарилмоқда» мазмунидаги постларда кўтарилган масалалар юзасидан «Ўзкимёсаноат» АЖ ва «Навоиазот» АЖ қуйидагиларни маълум қилади.

«Навоиазот» АЖ ўз иш фаолиятида Ўзбекистон Республикасининг амалдаги Қонунлари, фармонлари ҳамда барча меъёрий-ҳуқуқий ҳужжатларидан келиб чиққан ҳолда корхонанинг атроф-муҳитга зарарли таъсирини камайтириш бўйича мунтазам равишда тизимли ва мақсадли ишларни олиб боради. Шу билан бирга «Навоиазот» АЖдан атмосферага тарқайдиган чиқиндилар ва корхонанинг экологик таҳлил (санитария) лабораторияси томонидан доимий назоратга олинган.

Санитария лабораторияси корхонанинг санитария муҳофазаси зонаси, Навоий шаҳри ва унга туташ ҳудуд доирасидаги атмосфера ҳавосидан мунтазам равишда намуна олиш ишларини олиб боради. Шамол йўналишини ҳисобга олган ҳолда Навоий шаҳри ҳудудидаги атмосфера ҳавоси ҳолатини мониторинг қилиш натижалари таҳлили «Навоиозот» АЖ корхоналарига хос бўлган фенол, оғир металллар ва шу каби бошқа ифлослантувчи моддаларнинг йўқлигини, азот оксидлари ҳамда аммиакнинг эса стандарт таркиби мавжудлигини кўрсатади.

Корхона жойлашган ҳудуд экологиясига таъсирни камайтириш мақсадида «Навоиозот» АЖда ҳар йили атмосфера ва сув омборларига чиқиндиларнинг чиқарилиши, энг муҳими уларнинг ҳосил бўлишини камайтириш, шунингдек, хомашё ҳамда энергия ресурсларини тежаш борасида чора-тадбирлар ишлаб чиқилади ва амалга оширилади.

2021 йилда бу борадаги ишларни амалга ошириш харажатлари 1 322,434 миллион сўмни ташкил этди. Шу жумладан:

- сув ресурсларини муҳофаза қилишга 500,598 млн.сўм;
- атмосфера ҳавосини муҳофаза қилишга 88,684 млн сўм;
- ишлаб чиқариш ва майший чиқиндилар ҳосил бўлишини камайтиришга 199,279 млн.сўм;
- ер ресурсларини муҳофаза қилишга 133,921 млн.сўм;
- экологияни тартибга солиш бўйича 399,952 млн.сўм.

Экологик вазиятни яхшилаш ва экологик хавфсизликни ошириш бўйича барча чора-тадбирлар «Навоиозот» АЖнинг ўз маблағлари ҳисобидан молиялаштирилмоқда.

«Навоиозот» акциядорлик жамиятида замонавий талабларга тўлиқ жавоб берадиган учта йирик инвестиция лойиҳаси ишга туширилиши ва эски аммиак, 1-2-босқичларда азот кислотаси ишлаб чиқариш, органик синтез (ацетилен ва бошқалар) ишлаб чиқариш бўйича айрим цехлар фаолияти тўхтатилиши натижасида, 2021 йилда атмосферага ифлослантувчи моддалар чиқарилишининг миқдори олдинги йилларга нисбатан сезиларли даражада қисқаришига эришилди. Бугунги кунда корхона томонидан фенол, оғир металллар каби зарарли чиқиндиларни атмосферага чиқариши мумкин бўлган технологик жараёнлардан фойдаланилмайди.

Ҳозирда барча қурилаётган ва реконструкция қилинаётган объектлар «Табиатни муҳофаза қилиш тўғрисида», «Экологик экспертиза тўғрисида»ги қонунлар, Ўзбекистон Республикаси Вазирлар Маҳкамасининг 2020 йил 7 сентябрдаги «Давлат экологик экспертизаси тўғрисида»ги 541-сон қарорига мувофиқ Ўзбекистон Республикаси Экология ва атроф муҳитни муҳофаза қилиш давлат қўмитасида атроф-муҳитга таъсирни баҳолаш тартиб-таомилдан ўтади ва Давлат экологик экспертизасининг ижобий хулосасидан сўнг амалга оширилади.

Маълумот ўрнида айтиб ўтамик, ижтимоий тармоқлардаги муҳокамаларда сўз брoган «Навоиозот» АЖ ҳудудида жойлашган «CONTINAZ ҚК» МЧЖ карбамид-формалдегид контсентрати (УФС-85) ишлаб чиқариш лойиҳаси атроф-муҳитга таъсирни баҳолашнинг тўлиқ тартиб-таомилларидан ўтган ва Давлат экологик экспертизасининг ижобий хулосасига эга. Корхона Австрия билан ҳамкорликда ташкил этилган бўлиб, ALDER (Италия) компанияси томонидан ишлаб чиқарилган замонавий ва юқори технологияли ускуналар билан жиҳозланган. Бундай ишлаб чиқариш қувватлари Италия, Бельгия, Туркия, Россия, Швеция ва бошқа қатор мамлакатларда қурилган. Маҳсулот ишлаб чиқариш жараёнида суяқ ва газсимон чиқиндилар ҳосил бўлмайди. Бундай натижага замон талабларига тўлиқ жавоб берадиган технологиялардан фойдаланиш эвазига эришилмоқда.

Жамоатчилик фаоллари ва фуқароларга ижтимоий тармоқларда турли хил асоссиз

маълумотларни тарқатишдан олдин «Ўзкимёсаноат» АЖ Матбуот хизмати билан боғланишлари ҳамда барча саволларга ишончли манбадан жавоб олишлари мақсадга мувофиқ бўлишини эслатиб ўтамиз. Навоий шаҳрида бўла туриб, жиддий муаммолар бор деб ҳисоблаб, «Навоиазот» АЖга мурожаат қилмасдан асоссиз маълумотларга таяниб постлар ёзилишининг ўзи таажжубли ҳолат. «Ўзкимёсаноат» АЖ очиқлик ва шаффофлик тарафдори эканлигини маълум қиламиз.

«Ўзкимёсаноат» АЖ Матбуот хизмат

source:

"Ўзкимёсаноат" акциядорлик жамияти

<https://new.uzkimyosanoat.uz/uz/press/news/rasmiy-bayonot-20220313>